

Interview met.....

[Jubileum: 50 jaor rapido >> Jubileumjaar](#)



Stel dich efkes veur....

Beej mien geboorte in Venlo kreeg ik de naam LEO BOGIE.

Ik bin 41 jaor getrouwde met Truus en weej woëne in Grubbevors.

Truus en ik hebbe ôs lière kinne in 't wiékhoeës in Genuë in de jaore zestig.

Weej organiseerde dao met 'n aantal vreejwilligers allerhande activiteite veur kinder, jeug en volwassene.

Pierre Vercoulen waar auk ein van die enthousiaste en dragende vreejwilligers ([foto](#))

Weej hadde allemaol 'n prima kóntak ônderein en we ginge elk jaor met de kinder op kamp.

Dan hebse nao 'n waek behuerlik de pièp oét .

Veur de vreejwilligers ware d'r jaorliks inkele feesäövendjes, waorônder 'n sinterklaosäövendje.

Beej 't lötje trekke kreeg ik Truus Lenders oét Maasbree, 'n stagiaire van de Jeugdleidersopleiding van de sociale academie oét Sittard.

Truus had op woensdaagmiddaag 'n kleutergruupke en we zooge ôs neet vuol.

Ik heb waat collega's van um gepols euver 'n surprièze-idee en toen bleek det Truus unne kièr onderwaeg naor Genuë "pech" had gehad aan ziene Mobilette.

Het had zien vader opgetròmmeld en dae haet um met Mobilette naor de garage gebrach wao de monteur 't mankement metein had gezeen.

De monteur haet um toen behuurlik oétgelache, typisch iets veur vrouwluuj zag hae, d'r is niks kepot de hebs gewoën de benzine op.

Truus kós d'r neet mei lache, maar schaamde zich rot.

Ik heb veur de surprièze-aovend 'n laevesgroëte

benzinepomp gemak,

kômpleet met slang en verlichte kop met 'n passend gedich netuurlik.

De surprièze haet blièkbaar indrôk gemak want we krege waat miér kóntak en det kóntak hilt noow al miér dan 40 jaor aan.

De zoels onderhand gaon dinke det sinterklaos éch besteit, dae haet sôms verrassende kedootjes in petto !

Ik werkde beej drôkkerie van Grinsven in Venlo en in 1968 zien we allebei naor Maastreech gegaon en hebbe idder op "*'n aparte kamer gewoënd*".

Noow verklaore ze dich veur gek, 2 kamers heure waat un geldverspilling !

Ik werkde in Maastreech in 'n voogdij-internaat wao jeug opgevange woord die door Justitie oët hoës geplaats waar.

Samewoëne waar string verbaanje beej de internate wao weej werkde dus hadde we idder netjes 'n eige kamer.

In 1969 zien we getrouwde en toen zien we auk metein 'n bietje op stand gaon woëne.



Weej woënde op de Kastièlhoeve in Bunde en vanaaf det moment ware we 'n bietje kastièlhièr en -vrouw.

Det klink toch gans anders dan op kamers woëne.

Dao hebbe we 'n dochter en unne zoon gekrege, det waar unne moëje tièd.

Vanaaf 1975 heb ik 'n paar jaor in 'n medisch orthopedisch kindertehoès gewerk, en aansloëtend in 'n gezinsvervangend tehoès veur verstandelik gehandicapte minse.

In 1983 zien we in Grubbevors gaon woëne.

Dao heb ik de daagopvang " De Baersdonck" veur volwassen verstandelik gehandicapte mei opgezatte.

't Is zoëgezag 'n bietje mien " kiendje".

De cliënte van 't creatief centrum hebbe 't decor veur de beertent van 't Alt Limburgs Schuttersfees geschilderd.

Op 4 juli hebbe vuël minse, die 't OLS in Grubbevors bezöch hebbe, det kinne bewôndere.

Wannièr waasse lid van Rapido en wielang bisse det gewaes.

Ik bin neet zoë lang lid gewaes van Rapido, van begin 1991 tot ind 1996 en ik meus stoppe umdet mien kneen vervaelend ging doon.

Daorum heb ik noow 'n niej kneen, de zuus allein nog 't littaeken, alles functioneert weer prima.

Ik vind Rapido 'n unieke vereiniging wao met elkaar raekening gehalde woort.

Met name met Mien Smeets heb ik dök op de bank zitte te babbele tösse de diverse partiekes door.



Waas ut nog leuk naó Rapido.

In 't begin misse de sociale kóntakte en de diverse activiteite die d'r al vanzelf beejhuerde.

Zoëas de gezellige brunch in Januari, de wiekende en 't wandele op Zôndaagmorge met unne ganse groep.

Umdet ik gaer kaok heb ik zelfs unne kièr mei geakaok beej de Cuisine ônder leiding van Rob Doesborg as ik mich good herinner.

't Laeve geit gewoën door, intösse hebbe we 4 kleinkinder en de daag völle zich vanzelf met andere leuke dinger.

Waat is de leukste of vervaelendste herinnering die se hebs oèt diene Rapidotied.

Ik heb diverse leuke herinneringe zoëas ik al aangegaeve heb.

De leukste en taeves de minst leuke herinnering waas 't wiekend in Gellinghausen in 't Sauerland in 1994.

We hadde op de zaoterraagaovend erg vuel lol gehad met auk 'n paar vraemde snuiters d'rbeej.

Op zôndaagmorge bleke die snuiters beej Vic Wiardi op "bezeuk" te zien gewaes.

Vic loog waat vrueger in bed umdet hae éin pilske te vuel gedrônke had en toen haet ein van die vraemde snuiters zien bôks met portemonnee gejat.

Vic had die bôks nimmer aan netuurlik maar die loog op de stool en Vic loog in bed.

Op Zôndaagmorge loog de bôks op straat, uiteraard zônder portemonnee.

Daezelfde morge krege we al vrueg 'n tillefoontje oét Grubbevors det Truus zien Mam plotseling euverleeje waar.
Det waar op zaoterdaagaovend al gebeurd en ze hadde mooder gevônde in eure stool met 'n stök vlaai in de hand.
Dan bisse metein neuchter en weej zien met 'n zwaor gemood nao 't ôntbijt naor hoes vertrokke.

Welke sport duisse noow en waat zien dien hobby's.

As sport vind ik zwumme erg lekker, det doon ik zeker eine kièr in de waek.
Fietse doon weej allebei gaer en sinds 'n klein jaor hebbe we unne elektrische fiets, 't veult wie 'n hand in de rök en ik kin 't idderein aanbevaele.
Aaf en toe gaon ik naor de sportschoël um fit te bliève en um mien gewich op pièl te halde, maar eigelik doon ik det taege miene zin.
Maar as ik nao 't douche in de speegel kièk, zeen ik waorum ik eigelik dökker naor de sportschoël môt.
Kaoke is 'n andere hobby van mich en as kok môsse geregeld preuve, det huert beej 't vak en is neet bevorderlik veur de lien.



Geisse gaer op vakantie en welke plek haet dien veurkeur.

Weej gaon gaer op vakantie en hebbe al 10 jaor unne caravan op de Veluwe staon wao we geregeld kômme..

Nog 'n vaste stek van ôs is 't duitse plaetske Innzell beej de Oësterriékse grens, wao we al jaore 'n Ferienwohnung heure.
Dao kinse prachtige wandelinge make, ofschoën ik leever fiets dan wandel, maar 't berglandschap is neet zoë geschik daoveur.
Toscane is mien favoriete plek en ik bin as opera-leefhebber al 3 kièr in de Verona-arena naor de Opera gewaes.
Door de unieke locatie is det 'n gans andere ervaring dan in 'n theater.

Op welche plek mûsse volges dich eine kièr in dien laeve gewaes zien.

Boéte Toscane haet Rome 't meisteindrôk op mich gemak.
De kiëks dao dien auge oét op die prachtige gebouwe zoeas 't Pantheon, 't Colosseum, de bekinde Trevi Fontein, allemaol herinneringe oét de Romeinse tièd.
Ik bin neet zoë van det Paus-gedeuns maar de St. Pietersbasiliek en 't St. Pietersplein zien erg indrukwekkend veur unne dôrpsbewoëner oét Grubbevors.
In Rome bisse ech neet allein, dao laupe aardig waat toeriste rônd met 'n fototoestel op den boèk en 'n bukske in de hand.

Waat haet de grutste impact gehad in dien laeve.

Truus en ik hadde 2 kinder dochter Mandy en zoon Roel.
Ôs dochter Mandy is op 14 jäörige laeftiéd onder den trein gekômme in Bliërick.
Mandy waar onderwaeg met 'n vriendinke oét Bunde en door eur kletse hebbe ze d'n trein neet gezeen of gehuerd.

Beej unne ônbewaakte euverwaeg mósse extra good oplette maar..... zien vriendinke waar net op tièd 't spoor euver en Mandy woort door de trein gegrepe.
Det is noow 25 jaor geleeje en in 't begin kinse det gaar neet vatte.
Nao verlaup van jaore gufse dien verdreet 'n plek en op de gekste momente kump de herinnering weer boave.
Waat op 'n andere meneer unne groëte impact gehad haet in ôs laeve en det van ôzze zoon is de geboorte van ôzze aldste kleinzoon dae autistisch is.
Ik bin met Bas as baby al gaon zwumme en heb mich altièd vuël met um bezig gehalde, we begrièpe ôs oëtstaekend.
Hae is noow 11 jaor en ik heb in de laup van de jaore unne speciale band met um gekrege.

Met wae zoelse 24 oor door wille bringe en waorum.

Ik heb oeits de actrice **Anne Wil Blankers** van 't statioen in Venlo naor 'n congres gebrach veur geistelik gehandicapten in Arcen.
Onderwaeg krege we 'n leuk gesprek euver van alles en nog wat.
Anne Wil haet zelf 'n gehandicapte dochter en verzôrgde in Arcen in de slotmanifestatie 'n laezing waobeej 'n winseliès aan Erica Terpstra woord aangebooje.
Same met **Herman Finkers** liek mich det 'n leuk stel um 24 oor mei door te bringe.
Ik dink det 't allebei minse zien met vuël deepgangk en Herman Finkers kin dao op zien meneer unne komische drei aan gaeve..
Ik zoel dan míéne beste kant laote zeen en veur eur iets lekkers kaoke as aafsloéter, det kós bes gezellig waere.

Wao hebse unne groëte haekel aan.

Ik heb unne haekel aan tuiniere, det is Truus zien aafdeiling.
Ik zeg dan altièd: " Truus steit beej ôs in den tuin 't meiste met de vot umhoëg."
't Klink waat grôf maar is beej ôs 'n normale oëtdrökking.
Det gefrot in de grônd of nog erger det schoefele is aan mich neet bestaejd, ik staon leever in de keuke te frotte.
Vaerder heb ik gen waardering veur minse die alles kos waat kos opziej zette en de ellebäög gebroéke um in eur carrière veuroét te kômme.
Ik bin ens veur de politiek gevraog en daouveur heb ik unnen tièd in 'n politieke cõmissie meigedreid.
Al gauw kwaam ik d'rachter det vuel politici veural oët zien op eigen belang en dök eur eige principes opziej môtte zette um 't gewinste inddoel te bereike.
Dus veur mich waar 't nao de iérste poging al verleeje tièd.

Hebs dich un laevesmotto en waat is det.

Mien laevesmotto is: **Maak dich neet sappel euver dinger waosse genne invloed op hes**

Zoelse iets aan dichzelf wille verandere en zoëjao waat dan.

Jaozeker, det zal veur 't gros van de minse waal gelde dink ik.

Ik heb geregeld ruzie met mien gewich, unne chippendale hoof ik neet te waere maar 'n kleine



30 kg. lichter zoel waal gemekkelik zien.

Det is mich al ens gelök maar 't blief d'r neet aaf jaomer genôg, 't zoëgenaamde jojo-effect.
Noow huer ik al 'n paar minse dinke, gangk dan elken daag naor de sportschoël, nou nae det
heb ik d'r neet veur euver.

Dan waer ik messchien té slank, dan kinne ze mich nimmer truuuk !

Veur de res heb ik niks te klage.

Hebse nog unne wins of wilse nog waat kwièt.

Ik heb al jaore unne stille wins. As echte operaleefhebber gaon ik geregeld naor de opera.
't Liek mich geweldig um zelf met 'n moeije bariton- of tenorstum op 't podium te staon en de
minse te laote geneete van mien stum.

Det meug auk in 'n operakoér zien.

Ik bin gebaore in fibberwari 1944 op de Luitherwaeg in Venlo en heb bliékbaar in de
schuulkelder van Manresa dökker 'n cóncert gegaeve, maar kreeg gén applaus.

Jaomer genôg kin ik neet zinge, alhoewaal..... in mienen druim heb ik al ens in Verona in de
Arena gezônge.

Wáát 'n umgaeving en akoestiek veur unne Opera..

Ik weit neet of alle druime bedrog zien, wae wet!!

Elly van Elswijk